

KIA SULEMANU



The history of King Solomon in Illo Busa as recorded in the books of the prophets: 1 Kings 1 - 11.

Adonia a gīna dì kia ũ

Kia Dauda zikũ kotokoto. Baa tó wà baza kùkune, ěni dì gi àkũ a deε. Akũ a ibaanɔ òne: Wá deke kia, to wà nɔkɔna wetenne, àkũ zĩkenne, ìkũ n gwa, ìkũ wute n seε, pɔ ěni su à n de dɔo yādi. Akũ wà gèe wà nɔkɔn maa wete Isila'ila busuũ piki, akũ wà bò Sunemu nɔgbē Abisagawa, wà a sè wà m̀do kiane. Nɔkɔna pì maa maamaae. Ìkũ kia gwa àkũ zĩkene, esõ kia di a dõ nɔgbē ũo.

Hagiti né Adonia a gīna dì akũ ka, à ò akũ mí da kpatabe tia. Akũ à s̄gonɔ sè kũ s̄denɔdo kũ nɔḡn gb̄en bapiakwi pɔ anda basi an d̄one ɛenɔdo. Zaa a ku, a mae di patawao à o b̄oyādi n̄da ke makai. Akũ s̄ ausu maaε. Abisalomu mí ȳõ m̀ à kpàwa. Akũ à ledokũkè kũ Zeluya né Yoabudo kũ sa'onna Abiatado, akũ an zèdo. Esõ sa'onna Zadoku kũ Yehoyada né Benayado kũ anabi Natādo kũ Simaido kũ Leido kũ a dogali gb̄aanɔdo andi zedoo. Adonia sa'ò kũ s̄anɔdo kũ zunɔdo kũ zune mekpananɔdo Gbemεε pɔ ku Logeli gb̄e'i seεwa. À a dakũn kianenɔ s̄isi piki kũ Yahuda pɔ de kia ibaanɔ ũnɔdo piki. I anabi Natā sisio kó Benaya kó Dauda dogali gb̄aanɔ kó a gīna dakũna Sulemanu.

Akũ Natā gèe Sulemanu da Baseba là à ò: Ndi ma Hagiti né Adonia kpatabè wá deke kia Dauda d̄õsaio de? To mà ledamma, lapɔ nda ke, ò n gīna si kũ n né Sulemanudo. Fete ò ge kia Dauda kĩa, ní one, pɔ à le d̄inne yāa s̄õ à ò n né Sulemanu mí da kpatabe akũ gb̄eũ akũ ḡεe ũ s̄õ bi? À kè laba Adonia mí kpatabèi? Gɔɔ pɔ n̄da yā pì one, maa mɔ s̄õ, mí a í

lafa. Akū Baseba gèe à kia lè a kpè'èè, zaapɔ kia zikùe. Sunemu nɔgbè Abisaga kudo gū. Baseba kùte à mikùtene, akū kia a là à ò: Bó n̄ yidii? À wène à ò: Baa, mɔkɔn n̄ ledà maakū n zɔbennane kū Deke n Lua tɔdo, n ò ma né Sulemanu mí da kpatabe, ikū de kia ū n gèe ūo de? Gwa ma deke kia, Adonia mí kpatabè tia, mí mba a yā dɔo. À sa'ò kū zunɔdo kū zune mekpananɔdo kū sãnɔdo dasidasi, à n neno s̄isi piki kū sa'onna Abiatado kū zīkan gēn'èede Yoabudo, es̄o i n zɔbenna Sulemanu sisio. Ma deke kia, mɔkɔn Isila'ilanɔ s̄ɔkpandi an piki, wà ma gbè pɔ da gō kia ū n gbè. Ma deke kia, tó n ta n dezino kīa, maakū kū ma né Sulemanudo, wàakū wá gwa taalidenɔ ū.

Pɔ ada yā'o kū kiado maka, akū anabi Natā kà. Wà ò kiane, anabi Natān di. Akū Natā m̀ à kùte kiane, à wùte a nesewa à ò: Ma deke kia, mɔkɔn mí n ò Adonia kpatabe, ikū de kia ū n gèe ū ya? Zaapɔ à gèe à sa'ò gbāa kū zunɔdo kū zune mekpananɔdo kū sãnɔdo dasidasi. À n neno s̄isi piki kū n zīkan dɔn'èededo kū sa'onna Abiatado. Andá pɔbe, andá imido tia, andá o: Lua kia Adonia dɔ kū aafiado! Es̄o i maakū n zɔbenna sisio kó sa'onna Zadoku kó Yehoyada né Benaya kó n zɔbenna Sulemanu. Ma deke kia, ase mɔkɔn mí n yā pì kè, akū n gi gbè pɔ da zīte kpataū n gèe ū odi waakūnɔ n zɔbennanɔne ya?

Sulemanu kpana kpataū

Akū kia Dauda ò: À Baseba sisimea. Pɔ Baseba m̀ à gè, à zè kia è. Akū kia ledàne à ò: Deke ku! À ma bo takasi pikiū.

Lé pɔ ma dìnne kũ Deke Isila'ilano Lua tɔdo, ma ò n né Sulemanu mí da kpatabe ma gběũ, ìkũ de kia ũ ma gěe ũ, maa ke gbāa sīansīan. Akũ Baseba kùte à mikùte tɔtewa kiane à ò: Ma deke kia Dauda, Lua n dɔ kũ aafiado gɔɔkepiki!

Akũ kia Dauda ò: À sa'onna Zadoku sisimeã kũ anabi Natãdo kũ Yehoyada né Benayado. Pɔ an kà kia kĩa, à ònné: À ma ibaanɔ nakāa à ge ma né Sulemanu didi ma faagawa, í gɛdo Gihɔ. Gũ sa'onna Zadoku kũ anabi Natãdo anda nisikawa, andí a di Isila'ilano kia ũ, í kuu pe à o kòto gbāado: Lua kia Sulemanu dɔ kũ aafiado! Bee kpe í sudo, i zĩte kpataũ, ìkũ de kia ũ ma gěe ũ. Akũ an ma di Isila'ilano kũ Yahudano gēn'eede ũ. Akũ Yehoyada né Benaya ò kiane: À ke maka! Deke n Lua n lé ma, ma deke kia! Lapɔ Deke kundo ma deke kia, àkũ ku kũ Sulemanudo maka sɔ, i a kpata lafa de n pɔla.

Akũ sa'onna Zadoku kũ anabi Natãdo kũ Yehoyada né Benayado kũ dogalinɔdo an gèe an Sulemanu di kia Dauda faagawa, an gèdo Gihɔ. Akũ sa'onna Zadoku nisi tuu sè Deke bazakpeũ, à nisi pì kà Sulemanuwa. Pɔ wà kuu pè, akũ gběmpiki ò kòto gbāado: Lua kia Sulemanu dɔ kũ aafiado! Akũ gběmpiki bò an tɛdi, andá su, andá kute pe, andá pɔnnake maamaa, akũ tɔte lùkpa kɔfi pɔ andá ke pì yãdi.

Pɔ Adonia kũ gbě pɔ à an sisinɔ pɔbè an làka, andá fete, an kɔfi pì mà. Pɔ Yoabu kuu'ɔ pì mà, akũ à ò: Bɔ kɔfi mí do bĩũ makai? I yã pì o à làkao, akũ sa'onna Abiata né Yonatã kà gɔɔ. Akũ Adonia ò: Mɔ n gě. Naaiden n ũ, bao nna n mɔdo. Akũ Yonatã ò Adoniane: Aai! Wá deke kia Dauda mí

Sulemanu kpà kpataũ. À sa'onna Zadoku kũ anabi Natãdo kũ Yehoyada né Benayado kũ a dogalinɔdo gbèe an gedo, akũ an gèe an a dì kia faagawa. Akũ sa'onna Zadoku kũ anabi Natãdo nisi kàwa, an a kpà kia ũ Gihõ. Pɔ an bò gũ an sù kũ pɔnnakenado, akũ bĩi wã. Kõfĩ pɔ a màn nu. Sulemanu zĩtena kpataũ kɔ. Akũ wá deke kia Dauda ibaanɔ m̀ an fɔɔkpàwa s̃, an ò Lua Sulemanu tɔbo de a pɔla! Lua a kpata gba gbãa de a pɔla! Akũ Dauda mikùte Dekene a wutebɔwa, à ò: Wà gbãakpa Deke Isila'ilanɔ Luawa! Zaapɔ à tò ma wesì ma gèe kpana ma kpataũle gbãa.

Pɔ vĩa gbẽ pɔ Adonia an sisinɔ kũ, akũ an basi, an baapiki a tana kè. Pɔ Adonia dá vĩaake Sulemanune, à fète à gèe à nà Deke sa'okĩidi, à a bẽna kũ. Akũ wà ò Sulemanune wà ò: Gwa, Adonia dá vĩamanne, à gèe à nà Deke sa'okĩidi a a bẽna kũna, ada o ò leda n zɔbennane gbãa, pɔ nda akũ deo. Akũ Sulemanu ò: Tó à a gĩna kũna d̃ gbẽ bẽede ũ, baa a mikã ke da letè zĩteo. Tó wà sù wà vãi ke lèwa s̃, àa gaε. Akũ kia Sulemanu gbẽnɔ zĩ an Adonia gò Deke sa'okĩiwa. Pɔ Adonia m̀ à kùtene, akũ Sulemanu òne: Ta n bewa.

Dauda Sulemanune gbana lé

Pɔ Dauda gagɔɔ kà kã, à a né Sulemanu gbà lé à ò: Mada ge gekĩa. S̃di, ndí nɔgõnke ke! Ndikũ Deke n Lua yãnɔ kũna, ndíkũ ta'o lapɔ a yidiba, ndíkũ a ɔtẽndɔkĩi gwa, ndíkũ a yãdinanɔ kũna kũ a ikoyãnɔdo kũ a yã'onnenɔdo, lapɔ a ku Musa ikoyã takadaũba, yã pɔ nda ke piki díkũ bo maa, n tá piki díkũ ke nna. Maka Deke da yã pɔ à òmea papa à ò, tó ma

nenɔ an an gīna kūna dō, mí andá ta'o lapɔ akū yidiba sīana, mí an sō kuakūwa, ma buinɔ dakū kpana Isila'ilanɔ kpataū gɔɔkepiki.

Ń yā pɔ Zeluya né Yoabu kèmea dō, lapɔ à Isila'ila zīkan gēn'eede gbēn pianɔ dèdè, Nee né Abinee kū Yetee né Amasado. À gbē pinɔ dèdè, an au fā a asanewa kū a ketenɔdo. I ke sō zīūo. Yā kene n ñnɔ leū. Su ñ to a mikā dadaū, i basa ta genɔbewa nideūo. Yāmaake Gileada gbē Baazilai nenɔgōnanɔne. Ñ an di gbē pɔ áakū pɔbe kōa n donɔ guaū, zaapɔ ankūnɔ mí an zèmodo gɔɔ pɔ máda basi n vīna Abisalomune. Biliaminu bui Gela né Simai, Bahulimu gbē kundo dɔ. À ma laalibo pāsīpāsī gɔɔ pɔ máda ge Mahanaimu. Pɔ à m̀ à dàmale Uudēdi, ma ledàne ma ò kū Dekedo maa a deo. Esō su ñ a to gū swagatesaio. Ń ñnɔ, lapɔ nda ke ñ ma pɔ fīa simea à ta genɔbewa, í dō.

Akū Dauda gà. Ulusalima kpáa pɔ wà a vī wì o Dauda bīi. A de Isila'ilanɔ kia ũ wè bapia, Hebeloni wè soopia, Ulusalima wè baakwi kū aakōdo. Sulemanu mí gē kia ũ a mae gēe ũ, a ku kpataū gāngān.

Adonia gana

Hagiti né Adonia gèe Sulemanu da Baseba lè, akū Baseba a là à ò: Aafia n mɔ ya? À wène à ò: Aafia! Adonia sùka à ò: Má yā vī pɔ mà onne. Baseba ò: O! Akū Adonia ò: Ń dō pɔ kpata de ma pɔ ũ yāa. Isila'ilanɔ wé dɔmadi an piki mà gō kia ũ, akū yā līte, ma dakūna mí kpatabè, zaapɔ Deke mí a kpāū.

Tiasa wabi mendo máda kemma, su ò gi kedimeao. Baseba ò: O! Akū à ò: Lamea kia Sulemanuwa à Sunemu nɔgbē Abisaga kpama na ũ, zaapɔ à ginneo. Baseba ònɛ: Tòò, má onenne.

Pɔ Baseba gèe kia Sulemanu ledi Adonia yā pì yādi, akū kia pì fète à gèe à dàle à kùtene, akū à sùka à mò à zìte a guuũ. Akū wà mò Basebane kū guudo, akū à zìte kia ɔpiadi. Baseba ò: Yā yōnkōn ke máda lamma, su ò gi kedimeao. Akū kia ò: La, Naa, má gio. Akū Baseba ò: To wà Sunemu nɔgbē Abisaga kpa n vīna Adoniawa na ũ. Akū kia Sulemanu a da là à ò: Bɔyādi nda Sunemu nɔgbē Abisaga la Adonianɛi? Kpata nda lane gū, zaapɔ ma vīnae. Nda kpata lane kū sa'onna Abiatado kū Zeluya né Yoabudo. Akū kia Sulemanu ledà à ò: Ma sì kū Dekedo, tó Adonia di ga yā pɔ à là pì yādio, Lua yā pāsī kemɛa bēebēe. Lapɔ Deke ma kpa kpataũ, à ma di ma mae Dauda gēe ũ, à ma ɔũ zīnnapète lapɔ à òba, ma sì kū Deke pido Adonia da ga gbāa. Akū kia Sulemanu Yehoyada né Benaya zī, à gèe à Adonia lè à a dè, akū à gà.

Sulemanu Abiata yana kū Yoabu ganado

Kia ò sa'onna Abiatane: Suka ò ta n bua Anato. À kōsì ò ga, esō maa n de gbāao, zaapɔ mɔkōn mí n Deke Lua akpati sè n gē ɛɛ ma mae Daudane, mí n zedo a ïadana pikiũ. Maka Sulemanu Abiata yà à a bò Deke sa'ozũ, pɔ yā pɔ Deke ò Eli bedeno musu Silo le à papa yādi.

Pɔ Yoabu a hūnkana mà, akū à basì à gèe Deke bazakpe ɔũu, à nà Deke sa'okīidi à a bēna kū. Yoabu zè kū Adoniado

yāa, esō i ze kũ Abisalomudoo. Pɔ wà ò kia Sulemanune, Yoabu basì à gè Deke bazakpe ɔũu, a ku sa'okĩ pì see, akũ Sulemanu ò Yehoyada né Benayane à ge à ɔtɔwa gũ. Pɔ Benaya gè Deke bazakpe ɔũu, à òne: Kia ò, mɔ n bo! Akũ Yoabu ò: Aai! Laũ maa ga. Akũ Benaya gbēnɔ zĩ kiawa à ò: Yā pɔ Yoabu zāsìman di. Akũ kia òne: Kene lapɔ à òba. N a de, ní a vĩ, pɔ a gbēdena pā yā su à wi maakũ kũ ma mae bedenɔdo musuo yādi. Deke da to a gbēdena yā wí a miwa, zaapɔ à ɔtɔ taalisai de gbēn pia pɔ an maa delanɔwa. À Nee né Abinee, Isila'ila zĩkan gēn'eede kũ Yetee né Amasa, Yahuda zĩkan dɔn'eededo dè ma mae lé sai. An dena yā dakũ wí Yoabu kũ a buinɔdo miwa gɔɔkepiki, esō Deke dakũ Dauda kũ a buinɔdo kũ a ɔũdo kũ a kpatado gba aafia gɔɔkepiki. Akũ Yehoyada né Benaya gè à Yoabu lè à a dè, akũ wà a vĩ a be gugbangbeũ. Akũ kia Yehoyada né Benaya di zĩkan gēn'eede ũ a gbēũ, sa'onna Zadoku sō Abiata gbēũ.

Simai gana

Kia gbēnɔ zĩ an Simai sisi, akũ à òne: Be ke Ulusalima la, ndĩkũ kuũ. Su n bo bĩũ la n ge gukeo. Nkũ dō sāsā to n bua Kidiloniwa, n gan nu. Esō n n gĩna dèe. Akũ Simai ò kiane: Yā maae, ma deke kia. Maakũ n zɔbenna maa ke lapɔ n òba. Akũ à gō Ulusalima maka gĩa gɔɔpia.

Wè aakō kpe Simai zò gbēn piano basì an tà Maaka né Akisi, Gata kia kĩa, akũ wà ò Simaine: N zɔnɔ ku Gata. Akũ Simai fète à kafu di a faagane, à gèe Akisi kĩa Gata a zò pinɔ wetedi. Pɔ à an e, akũ à an sete Gata à sùndo. Akũ wà ò

Sulemanunε, Simai b̀ò Ulusalima, à g̀èe Gata à s̀uka à s̀u. Akũ
kia gb̃ẽnɔ z̃i an Simai s̀isiakũnε, akũ à ònε: Ma tò n ledà n ò n
s̀i kũ Dekedo, akũ ma lezàmma ma ò, z̃i pɔ n bo la n g̃εε guke,
̀nkũ d̃õ n gan nu. Akũ n òmεa, yã maaε, n mà. Bɔyãdi n bo
leda pɔ n k̀è n ò n s̀i kũ Dekedo kũ yã pɔ ma d̀innεdo kp̃ei?
Akũ kia s̀uka à ònε dɔ: Yã ṽai pɔ n k̀è ma mae Daudanε d̃õũ
piki. Deke mí da to yã ṽai p̃i wi n miwa sà, es̃õ àa
balikakamaũ, i Dauda kpata z̃innapete g̃angãn, àakũ lakana
ṽio. Kia yã'ò Yehoyada né Benayanε, akũ à g̀èe à Simai l̀è à a
d̀è. Maka Sulemanu kpata z̃innap̀ete.

Sulemanu ̃nɔ lana

Sulemanu ledokũk̀è kũ Masa kia Fili'aunado, à a nenɔgb̃ẽ
s̀è na ù, à s̀udo Dauda b̃iũ ee àkũ ge à a kp̀é kũ Deke kp̃edo kũ
Ulusalima g̃ido lededi. Gɔɔ bee wi kp̀é dɔ Dekenε yãao, akũ
wikũ sa'o gu lez̃i pɔ wà b̀onɔwa. Sulemanu yi Dekedi, a a mae
Dauda yãdinnεnɔ kũna, es̃õ ì sa'o gu lez̃i pinɔwae, akũ ìkũ
tulaleti ka t̃ẽũ gũ.

Akũ à g̀èe Gibeõ sa'odi, zaapɔ gu lez̃i bee mí d̃ẽnla. À sa
pɔ wì a pɔ ka t̃ẽũ à tekũ ò gũ kũ sa'obɔnɔdo men oaa sɔo. Akũ
Deke b̀ò à m̀dwa nanaũ gũ gwãaf̃i à ò: Pɔ pɔ ní yidi lama. Akũ
Sulemanu ò: N yã maa k̀è n z̀obenna ma mae Daudanε
maamaa, pɔ a denne gb̃ẽ maa naaide nesepuade ù yãdi. N
yindi z̃õk̃õ k̀ènε, n tò maakũ a né dá kpatabe a g̃εε ù ee m̀na
gbãa. Tia diba Deke ma Lua, n maakũ n z̀obenna kpà kia ù ma
mae Dauda g̃εε ù. Ausun ma ù, maba d̃ɔn'εedeke yã d̃õo.
Maakũ n z̀obenna, má ku kũ n gb̃ẽ pɔ n s̀enɔdo, gb̃ẽ dasi pɔ wa

fĩ wà an nao wà an lé d̄õnɔ. To maakũ n zɔbenna màkũ laakai vĩ, to màdi yãkeke n gbẽnɔnɛ mà maa d̄õ k̄õnɛ kũ vãido. Tó maka s̄õ, laba maa ke mà yãkeke n gbẽ dasi pinɔnei? Yã pɔ Sulemanu là pì à kà Dekeũ, akũ à ònɛ: Lapɔ n yã pì là, ndi unde gbãá lao kó aizeke kó n ibeɛnɔ gana, sema yãkekɛna a zɛwa d̄õna n là, maa ke lapɔ n làba, maa n gba ãnɔ kũ laakaido. Gbẽ pɔ ku n ãa kó gbẽ pɔ dakũ ku n kpɛ, an gbẽke ãnɔ da kambao. Maa pɔ pɔ ndi lao kpamma dɔ, maa n gba aizeke kũ gakwido piki, kia ke da kambao ee òn gɛ òn gado. Tó ñda ta'o lapɔ má yidiba, mí ñ ma yã'onannɛnɔ kũ ma yãdinanɔdo kũna, lapɔ n mae Dauda kũna yãaba, maa n gba unde gbãá. Akũ Sulemanu vũ, zaapɔ nana ada o. Akũ à tà Ulusalima à gèè à zè Deke í kuna kũ Isila'ilanɔdo akpati ɛɛ, à sa pɔ wì a pɔ ka teũ à tɛ kũnɔ ò gũ kũ saabukpa sa'obɔnɔdo, akũ à pɔbena dasi kè a ibaanɔnɛ.

Sulemanu yãkekɛna gbayiannnɔnɛ

Zĩkezĩ gbyaianna gbẽn pianɔ m̀ Sulemanu kĩa, an zè a ɛɛ. An gbẽ do ò: Gaafaa kemɛa Baa. Maakũ kũ nɔgbẽ dido wá ku kpé dokũɛ. Akũ ma nɛ'ì, waakũnɔ wá pia kpé piũ. A gɔɔ aakɔde zĩ akũ nɔgbẽ pì nɛ'ì s̄õ. Waakũnɔ wá pia kpé piũ, gbẽke ba ku k̄awado gũo. Pɔ nɔgbẽ pì wùte a nenɔgɔna piwa gwãafĩ, à gà. Akũ à fète gwãafĩ waideo, à ma nenɔgɔna sè ma sɛɛ gɔɔ pɔ maakũ n zɔbenna máda i'o, à wùte a kuawa, akũ à né pɔ gà pì sè, à wùtemɛa ma kuawa. Pɔ ma vũ kɔnkɔ mà yɔkpa ma nɛwa, akũ ma è gèè. Pɔ ma gwà, mi e ma nɛ ina ũo. Akũ nɔgbẽ pì gbẽdo ò: Ɛkɛɛ! Ma né mí b̄éé, n né mí gà. Akũ

nɔgbē kaaku ò: Ekεε! N né mí gà, ma né mí bēε. Akū andá lekpaakūke kia εε.

Akū kia ò: Gbē do ò akū né mí bēε, n né mí gà, mí gbē do ò, ekεε, n né mí gà, akū né mí bēε. Akū à sùka à ò: À mɔmεa kū fēndado. Akū wà m̀done. Kia ò: À né pɔ bēε pì z̄ε pia, í a k̄ɔ kpa gbē dowa, í a k̄ɔ kpa gbē dowa. Akū nɔgbē pɔ a né mí bēε, ne pì kènε wewēnda, à ò kiane: Baa, né pɔ bēε pì kpawa, su ò a deo. Akū a gbēdo ò: Àakū de ma pɔ ũo, àakū de n pɔ ũ s̄o, wà a z̄ε pia. Akū kia yākèke à ò: Wà né pɔ bēε pì kpa nɔgbē kaakuwa. À su à a deo, a dan nu. Pɔ Isila'ilano yākekεna pɔ kia kè pì mà, a yā an gbá vīa, zaapɔ an è Lua a gbà òno à yā kekenné a zewa.

Sulemanu ibaano

Kia Sulemanu mí Isila'ila bui piki kia ũ. A bùsu gēn'εedenɔ tɔn di: Zadoku né Azalia mí sa'onna ũ. Sisa neno Elihɔlfu kū Ahiado mí a lakēnnano ũ. Ahiludi né Yehosafata mí a kaseedikanna ũ. Yehoyada né Benaya mí a zīkan gēn'εede ũ. Zadoku kū Abiatado mí sa'onnanɔ ũ. Natā né Azalia mí a bùsu gēn'εedenɔ gbē z̄k̄ɔ ũ. Sa'onna Zabudu, Natā né mí a ledammade ũ. Ahisaa mí a be yākekεna ũ. Abeda né Adonilamu mí zɔzī gbē z̄k̄ɔ ũ.

Kia Sulemanu Isila'ila bùsu gbē z̄k̄ɔno òidi gbēn kwi weεpia. Wē kū wēdo an baapiki ò kia pì kū a ɔūdenɔdo gwa kū pɔbenado mɔ dodo. An tɔnɔn di: Hulu né mí εfelaimu buino bùsu sīsīde vī. Dekeε né mí Makaza kū Saalibimudo kū

Betesemesido kũ Eloni Betehanado vĩ. Hesedi né mí Alubo vĩ. Soko kũ Hefee bũsu lesido a pɔe do. Abinadabu né mí Doo gu sĩside vĩ. Sulemanu nenɔgbẽ Tafa mí a na ũ. Ahiludi né Baana mí Taanaki kũ Magidodo kũ Betesã bũsu pɔ ku Zaletã see kũ Yezeleli zĩtedo vĩ piki sena zaa Betesã ee Abeli Mẽhɔla ee Yɔkemamu kpele. Gebee né mí Lamɔtu Gileada vĩ. Manasa né Yayi mí bĩikonna pɔ ku Gileada busuĩnɔ vĩ kũ Aagobu bũsu pɔ ku Basanado kũ a bĩi zɔkɔ gĩdenɔdo men baakɔ. Wà an gĩle tatabɔnɔ kè kũ mɔtẽado. Ido né Ahinadabu mí Mahanaimu vĩ. Ahimaaza mí Nafatali bũsu vĩ. Akũ mí Sulemanu nenɔgbẽ Basema sè na ũ. Husai né Baana mí Asilu buinɔ bũsu vĩ kũ Alotido. Palua né Yehosafata mí Isaka buinɔ bũsu vĩ. Ela né Simai mí Biliaminu buinɔ bũsu vĩ. Uli né Gebee mí Gileada bũsu vĩ. Amɔlinɔ kia Sihɔ kũ Basana kia Ogudo mí kuũ yãa. Gebee mí bũsu pì gẽn'eede ũ a do. Yahudanɔ kũ Isila'ılanɔdo an dasi landɔ tekule busunkonaba. Andikũ pɔbe, andikũ imi, andikũ pɔnnake.

Sulemanu í nna mana kũ a ɔnɔdo

Sena zaa Yufuleti ee Filisitini busuũ kũ Masa bũsu ledɔ, Sulemanu mí bũsu pinɔ kia ũ piki. Bũsu pinɔ gbẽnɔ dikũ wẽ'ngɔ kpawa ee a unde leũ. Sulemanu ɔũ gɔɔ do pɔbenan di: Buloditi kilo oaa sɔosɔo lee sɔo, wititi kilo oaa sɔosɔo lee kwi. Zù pɔ wà gwà be à gbẽtẽ kũ men kwi, kpàsa zù bao, sã basɔo kũ bannanɔdo kũ tuenɔdo kũ bukanɔdo kũ ko maanɔdo do. Zaapɔ akũ mí bũsu pɔ ku Ufulaiti musu ɔdinɔdo piki kia ũ zaa Tifasa ee Gaza, mí yãkete ba ku gukeo. Sulemanu gɔɔ

Yahudanɔ kũ Isila'ila pɔ ku zaa Dã ee Beesebanɔdo an katena an busuũ aafia, baapiki kũ a inabi lido kũ a sēngone lido.

Sulemanu s̄ pɔ andì gó gateno yikii oaa sɔosɔo lɛɛ siikō (4,000), a pɔ pɔ wì dino s̄ oaa sɔosɔo lɛɛ kwi wɛɛpia (12,000). Bùsu gbē z̄k̄ pɔ à an didi pinɔ s̄, an baapiki dikũ mɔne kũ pɔbenado mɔ pɔ wà ònewa, kia Sulemanu kũ gbē pɔ andì mɔ pɔbedidonɔdo pɔ ũ. Peke dí k̄s̄ammáo. Andikũ mɔ s̄ pinɔne kũ esedo kũ s̄ giido dɔ gu pɔ an ku, lapɔ wà ò an baapikineba.

Lua Sulemanu gbà òno kũ wezēnado maamaa à kè zài. Wàa f̄ wà a d̄na lé d̄o, lapɔ wàa f̄ wà tekule busunkona lé d̄oba. Sulemanu òno de z̄itedeno kũ Masa gbēnɔdola piki. A òno de gbēmpikila. A de Ezala bui Etanila kũ Maholi nenɔ Hemani kũ Kalakolido kũ Daadado. À tɔbò bùsu pɔ likanadinũ piki. À yaasezù oaa sɔosɔo lɛɛ aakō (3,000), mí le pɔ à òno kà oaa sɔo kũ sɔodo (1,005). À lino kũ lanɔdo yã bɔketekè, sena zaa gbé lí pɔ ku Lebanɔ busuũ ee à gèè à pè lá pɔ ò bute ḡwanɔwa. À nɔbɔno yã òdànné dɔ kũ b̄nɔdo kũ pɔnesegaatennanɔdo kũ kpɔnɔdo. Kia pɔ ku ānuānɔ an a òno bao mà an piki. Bùsu kũ busudo piki an an gbēno z̄, an gèè an a òno mà.

Sulemanu Deke kpé sookena

Pɔ Taya kia Hilamu mà wà Sulemanu kpà kia ũ a mae gbēũ, à a ibaa kenɔ z̄iwa, zaapɔ Dauda gbēnnae yãa. Akũ Sulemanu gbēno z̄ Hilamu piwa à ò: N̄ d̄o pɔ ma mae Dauda

di le à kpɛ dɔ̄ Deke a Luaneɔ, pɔ̄ bui pɔ̄ likanadinɔ̄ dá zĩkado yãdi, ee Deke gɛ̄ɛ à an kenɛ gbadibɔ̄ ũ. Tia diba sɔ̄ Deke ma Lua tò ma kãmabokii è. Ibetɛ ba ku gukeo, muse ba kuo. A yã mí tò má yidi mà kpé dɔ̄ Deke ma Luane, lapɔ̄ Deke ò ma mae Daudaneba à ò, a né pɔ̄ akũda kpa kpataũ a gɛ̄ɛ ũ mí da kpé dɔ̄akũne. Yã di gbẽnɔ̄ne an Lebanɔ̄ sida linɔ̄ zɔ̄zɔ̄mea. Ma zĩkennanɔ̄ da zĩ pì ke kũ n zĩkennanɔ̄do kɔ̄a, mí n zɔ̄benna pinɔ̄ fiabonne lapɔ̄ n òba piki. N̄ dɔ̄ pɔ̄ wába gbẽke ví à lizɔ̄ dɔ̄ de aakũnɔ̄ Sidɔ̄denɔ̄bao.

Pɔ̄ Hilamu Sulemanu yã pì mà, a pɔ̄ kè nna maamaa à ò: Wà gbãakpa Dekewa gbãa, zaapɔ̄ à Dauda gbà né ãnɔ̄de, ada gɛ̄ ɛɛ a gbẽ dasi pinɔ̄ne. Akũ Hilamu gbẽnɔ̄ zĩ Sulemanuwa à ò: Ma lekpele pɔ̄ n kèmea mà. Maa ke lapɔ̄ n̄ yidiba sida linɔ̄ kũ kpẽ linɔ̄do yã musu. Ma zĩkennanɔ̄ da lí pinɔ̄ se zaa Lebanɔ̄ sĩsĩnɔ̄ musu, anda pitado tekule, mí yiyi mà gbẽnɔ̄ zĩdonne teku musu. Gu pɔ̄ n òmea, gũ maa tó wà katenne, ní tado. Mɔ̄kɔ̄n sɔ̄, yã pɔ̄ má yidi ò kemea mí pɔ̄bena kpana ma ɔ̄ũdenɔ̄wa ũ. Maka Hilamu òkũ sida linɔ̄ kũ kpẽ linɔ̄do kpa Sulemanuwa lapɔ̄ a yidiba. Sulemanu sɔ̄ òkũ pɔ̄wena kpawa wẽ kũ wẽdo tɔ̄n oaa sɔ̄osɔ̄o lee aakɔ̄ (3,000) kũ nisido lita oaa sɔ̄osɔ̄o lee ɔ̄aa pia (400,000). Deke Sulemanu gbà ãnɔ̄ lapɔ̄ à a le òneba. Hilamu kũ Sulemanudo an nna kũ kɔ̄do, akũ an ledokũkè.

Kia Sulemanu gbẽnɔ̄ sèse Isila'ila buinɔ̄ piki, à an dá zĩ piũ gbẽn oaa sɔ̄osɔ̄o lee baakwi (30,000). Ìkũ an zĩ Lebanɔ̄ mɔ̄ kũ mɔ̄do gbẽn oaa sɔ̄osɔ̄o lee kwi (10,000). Gbẽ pinɔ̄ ò ke

Lɛbanɔ mɔ do, akũ andì su an ke be mɔ piapia. Adonilamu mí zɔzĩ pì gbě zɔkɔ ũ. Sulemanu gbepaannanɔ vĩ gu sīsĩdeũ gbĕn oaa sɔsɔɔ lɛɛ basiikɔ (80,000), a setennanɔ sɔ gbĕn oaa sɔsɔɔ lɛɛ baakɔkwi (70,000). Gbĕ pinɔ baasi, Sulemanu gbĕnɔ didi gbĕn oaa sɔsɔɔ lɛɛ aakɔ kũ oaa aakɔdo (3,600), ankũ zĩ pì gwa. Kia yã dì, akũ wà gbĕ gbĕtĕ maanɔ pàapaa, wà à wà sĕte wà sùdo kpé pì datebɔnɔ ũ. Maka Sulemanu kpedɔnnanɔ kũ Hilamu kpedɔnnanɔdo kũ Gebalidenɔdo an li zɔzɔ an kĕke, an gbĕ kĕke kpé pì dɔbɔ ũ.

Sulemanu Deke kpedɔna

Isila'ilanɔ bona Masa wĕ oaa pia kũ basiikɔdo (480) kpɛ, Sulemanu kpatabena wĕ siikɔde, a mɔ piade pɔ wì o Ziviũ, akũ à nà Deke kpedɔnawa. Kpé pɔ à bò Dekene pì gbǎá ɔlena baakɔ, a yaasa bao, a lezĩ baakwi. Kpé pì balanda vĩ, a yaasa sáa kpé pìdo ɔlena bao, a gbǎá kwi. À a taaganɔ kĕ, a bàasi ɔdi yaasa, a guũ ɔdi fĩnkonɔ. À kpé fĩnanɔ kĕ à lìka kpé pidi kũ a luakukĩido kpado kũ kpadodo kũ a kpedo. À didi kɔla aakɔ, kpé fĩna pɔ ku zĩtenɔ yaasa ɔlena sɔsɔɔ, pɔ pɔ ku guaũnɔ soododo, pɔ pɔ ku musunɔ soopiapia. Deke kpé gbĕ pɔ ku musunɔ yaasa kĩsǎ zĩte pɔdi, pɔ wà le wà kpé fĩna línɔ didiwa kpé pì gĩfɔsai yãdi.

Pɔ wada kpé pì dɔ, wà dɔ kũ gbĕ pɔ wà pàa zaa a paakĩido. Wi masana kó gǎ kó zĩkebɔ ke kɔfĩ ma kpé pì dɔkĩao. Kpé fĩna pɔ ku zĩtenɔ piki lé gona mendo genɔmidɔkĩi ɔdi. Dedekĩi gĕe kpé fĩna pɔ ku guaũnɔ kũ kpé fĩna pɔ di a musunɔdo kĩa. Pɔ à kpé pì dɔ à làka, à kpà kũ línɔdo kũ sida lí

pelelenɔdo. À kpé fɔna pinɔ dɔ kpé pì gbǎá leũ. An piki lezĩ ɔlena sɔsɔɔe, mí wà pè kɔwa kũ sida lido Lua kpé piwa.

Akũ Deke yǎ'ò Sulemanune à ò: Kpé pɔ náda dɔ di yǎ musu, tó náda ma ɔtɛndɔkĩi gwa, mí n ma ikoyǎno kũna, mí n ma yǎdinano kè, náda zĩkewa, maa lé pɔ ma dì n mae Daudane kenne. Maakũ ku kũ ma gbɛ Isila'ilanoɔdo, maa n tó gũo.

Pɔ Sulemanu kpé pì dɔ à làka, à sida lí pelelenɔ nàna a gĩwa a guũ kpekpe zaa zĩte ee a línɔwa, akũ à kpɛ lí pelelenɔ kpàte a zĩte piki. À kpɛ'ee kè kpé piũ luakukĩi ũ, a gbǎá ɔlena bao, akũ à sida lí pelelenɔ nàna a gĩwa kpekpe zaa zĩte ee a línɔwa. Kpé pì kàta gbǎá ɔlena bapia. Sida lí pɔ wà nàna kpé piũ, wà wǎsǎkɛwa landɔ tuunɔba kũ lavũ puiananoɔdo. An piki sida líe, a gbè ke di gɔ guke wà èo. À kpé pì kpɛ'ee kèke Deke í kuna kũ Isila'ilano akpati dikĩi ũ. Kpɛ'ee pì gbǎá ɔlena bao, a yaasa dɔ bao, a lezĩ bao. À zĩnali tɛtɛɛ nàna kpɛ'ee pì gĩwa piki. À tulaletikpasakĩi pɔ wà kè kũ sida lido nàna kũ zĩnalido dɔ. À zĩnali tɛtɛɛ nàna kàta gĩwa dɔ, akũ à mɔ bà pɔ wà pì kũ zĩnalidonɔ pǎpǎ kpɛ'ee gĩ pɔ à zĩnali nànwawa piwa kàta ɔdi. À zĩnali nàna kpé piũ kpekpe kũ tulaletikpasakĩi pɔ ku kpɛ'ee pì gĩ sɛɛdo.

À kù lí à malaika gǎsĩdenɔ ũ men pia, à dì kpɛ'ee piũ. Malaika pinɔ lezĩ ɔlena kwi. An gǎsĩ gbǎá ɔlena sɔsɔɔe. Zaa gǎsĩ do lewa la ee a do lewa le a gbǎá ɔlena kwi. Malaika men pia pinɔ bɔ kɔbae, an dokũe kéke. An pia an piki lezĩ ɔlena kwikwie. Akũ à an kate kpé pì kpɛ'eeũ. An gǎsĩno potopotona, a do gǎsĩ gèe à pè gĩwa le, a do pɔ pè gĩwa la, akũ an gǎsĩ pɔ

gɔ̃nɔ pɛ kɔ̃wa kpɛ'ɛɛ pɪ guaũ. À zĩnali nàna malaika pinɔwa dɔ. À wàsākɛ̃ kpé pɪ gĩnɔwa kpɛ'ɛɛũ kũ kàtado piki landɔ malaika gàsĩdenɔba kũ daminɔ linɔdo kũ lavũ puiananɔdo. À zĩnali nàna kpé pɪ zĩtewa dɔ, kpɛ'ɛɛũ kũ kàtado piki. À kpɛ'ɛɛ pɪ kpelenɛnɔ kũ a lí pɛtenanɔdo kè kũ kù lido. À wàsākɛ̃ kù lí kpelene men pia pinɔwa landɔ malaika gàsĩdenɔba kũ daminɔ linɔdo kũ lavũ puiananɔdo, akũ à zĩnali nànwawa, wàsã pinɔ bònɛ wasawasa. Maka à kàta lí pɛtenanɔdo kè kũ kù lido dɔ. Akũ à a kpelene kè men pia kũ kpɛ̃ lido. Kpelene pinɔ dɪ kpakĩ a guaũ piapia. Akũ à wàsākɛ̃ kpelene pinɔwa landɔ malaika gàsĩdenɔba kũ daminɔ linɔdo kũ lavũ puiananɔdo, akũ à zĩnali nànwawa, wàsã pinɔ bònɛ wasawasa.

À gĩ dɔ à likadi. Gĩ pɪ gbè pɔ wà pàanɔ vĩ didi kɔ̃la dɔɔ aakɔ̃, akũ sida lí pɔ wà zɔ̃nɔ katɛna a musu. Wà Deke kpé pɪ zĩnnapɛtɛ Sulemanu kpatabena wè siikɔ̃de mɔ pɔ wì o Ziviũ, akũ wà a ledè a wè kwi wɛɛdode mɔ swaakɔ̃de pɔ wì o Buluũ lapɔ à kpé pɪ zĩ dɪba. A dɔna kũ a kɛkenado kà wè soopia.

Sulemanu bɛkena

Sulemanu bɛ zĩ kè piki wè kwi wɛɛ'aakɔ̃. À Lebano líkpɛ kpé dɔ, a gbáá ɔlɛna basɔɔ, a yaasa bapiakwi, a lezĩ baakwi. À sida linɔ pɛtɛpɛtɛ dɔɔ siikɔ̃, akũ à sida lí pɔ wà pàanɔ dàdala men bapia kũ sɔdo, dɔɔ kũ dɔɔdo men gɛogɛo, akũ à sida linɔ kpàkpa sida lí pɔ wà dàda pinɔla. À a taaganɔ bòbo dɔɔ aakɔ̃ didikɔ̃la ɛɛdɔna kɔ̃wa. Kpé pɪ lenɔ lezĩ kũ a yaasado piki saae. A lenɔ aakɔ̃'aakɔ̃ kpɛle kũ kpɛlado ɛɛdɔna kɔ̃wa.

À lí pètepete kpé pì εε, a gbǎá ɔlena bapiakwi, a yaasa baakwi. À kata'ɔle bò lipetena pinɔ εε, akū à linɔ pètepete à balanda kè kàta pì εε.

À zĩtekĩi bò kata piũ. Gũ ì yǎkeke, akū wì o Yǎkekekata. À sida lí pelelenɔ nàna a gĩwa zaa zĩte ee a linɔwa. A kpé pɔ ì iũ ku εε. À bò kɔba kũ kàta pido. Maka kpé pɔ à dɔ Fili'auna nenɔgbě pɔ à sè na ũne de dɔ. Kpé pinɔ bona, gbè maanɔ an wà dàtedo ee à gèè à pèdo a sàkawa. Wà gbè pinɔ pàapaa, akū wà bàsa wà z̄ɛz̄ɛ kũ zetudo kpe piapia piki. Makaε ɔũ kũ baasido piki. Wà kpé pinɔ kpàte kũ gbè gbětě maanɔdo, a kenɔ gbǎá ɔlena kwi, a kenɔ swaakɔ. Akū wà bàsa wà dɔ kũ gbè maa pɔ wà pàapaa wà ànɔdo kũ sida lido. À gĩ dɔ à lika ɔũ z̄ɔk̄ɔ pidi, a gbè pɔ wà ànɔ vĩ didik̄ɔla dɔɔ aakɔ, akū sida lí pɔ wà ànɔ katena a musu, landɔ Deke kpé kũ a kàtado ɔũ gĩba.

Deke kpé pɔnɔ

Kia Sulemanu gběnɔ zĩ Hulamu sisidi Taya, akū wà sùdo. Hulamu pì da Nafatali buie, mí gyaanɔε. A mae Taya gběε, mí mɔt̄ɛa ɔzĩkennaε. Hulamu pì ɔnɔ vĩ kũ wez̄ɛnado kũ d̄ɔnado mɔt̄ɛa zĩ pikiũ. Pɔ à mɔ kia Sulemanu kĩa, akū à zĩ pɔ kia pì dànɛ kè piki. À ginsiki pì men pia kũ mɔt̄ɛa gbãado. An piki lezĩ ɔlena ḡɛo weε'aakɔ, a z̄ɔk̄ɔ kwi weεpia. À fùa pì kũ mɔt̄ɛa gbãado men pia, à kùte ginsiki pinɔ musu. Fùa pinɔ lezĩ ɔlena sɔɔsɔɔε. À mɔ bànɔ pì, akū à lòko fùa pinɔwa salika ũ, an lokolokona men soopia. À wāsāk̄k̄ è à lika fùa pinɔdi landɔ gwaiba nenɔba dɔɔ pia, mɔ bà pinɔ zĩte kũ musudo. Fùa pinɔ dokū piki. À fùa pinɔ pì kũ wāsádo landɔ bado vũba, landɔ

Deke kpé kàta pɔba. Bado wāsā pì lezī ɔlena siikō. À wāsākē landō gwaiba neba ginsiki fua pinɔ kùdɔkìi musu men oaa dodo likana m̀ b̀a pinɔdi dɔɔdɔɔ. Akū à ginsiki pinɔ p̀etepete Deke kpé kpele ɔpiadi kù ɔzengedo. À tokpà ɔpia pɔne Yakini, ɔzenge pɔ s̄ Bɔza. Ginsiki pì fua b̀ landō bado vūbae. Maka à ginsiki pinɔ pì piki.

À m̀ kè ikakii ũ bodogo. A lé la ee a lé le ɔlena kwi, a lezī sɔo, a zōkō s̄ baakwi. À wāsākē ikakii piwa landō tuunɔba, à lika a ledi zīte dɔɔ pia, ɔlena dodo tuu men kwikwi. À ikakii pì kè kōa kù tuu wāsā pinɔdo. Ikakii pì di zusa men kwi weepianɔwa. Zù men aakōnɔ m̀ do genɔgbadɔkii ɔdi, men aakōnɔ musu ɔdi, men aakōnɔ genɔmidɔkii ɔdi, men aakōnɔ do zīte ɔdi. Ikakii pì di an musu, mí an gbènɔ dɔɔɔ guaũ. Ikakii pì geete ɔta doe. A swá de landō ta swaba, landō tōnnaba. Galua zōkō lee oaa do í an ta pì di se.

Pɔ pɔ Hulamu pì kia Sulemanune Deke kpé pɔ ũnɔ piki, à pì kù m̀tēado, akū wà kè gbɔɔgbɔɔn. Kia ò wà kasa kù Uudē dāna ḡido pɔ ku Suko kù Zaletādo zāngua. Sulemanu di pɔ pɔ wà pì kù m̀tēa pinɔ ȳ zakawa à a gbia d̄o, pɔ a dasi kè zài yādi.

Sulemanu pɔ pɔ ku Deke kpunɔ pì do, tulaletikpasakii pɔ wà kè kù zīnalido kù zīnali tebuli pɔ wì Deke bulodi katewado, kù fitiadibo pɔ wà kàte kpele kpe'ee leūnɔdo ɔpiadi kù ɔzengedo sɔosɔo. Wà pì kù zīnali tēetēedo kù a fitianɔdo kù a kpàkonɔdo piki, wà wāsākēwa landō lavū puiananɔdo. Zīnali imibɔnɔ kù fitiadebɔnɔdo kù tanɔdo kù ḡmɔnanɔdo kù

takasonanɔdo kũ kpɛ'ɛɛũ pɔ wì o luakukĩi kpɛlene lipete sɔtɔkĩinɔdo kũ kpɛle pɔnɔdo. Pɔ kia Sulemanu Deke kpé zĩ pì kè à làka piki, akũ à m̀ kũ zĩnalido kũ sulubado kũ pɔ pɔ a mae Dauda dì Deke pɔ ùnɔdo, akũ à kà Deke kpé bɔndabiũ.

Tana kũ Deke akpatido a kpu

Akũ kia Sulemanu Isila'ila gbě zɔkɔnɔ sisi Ulusalima, an bui gẽn'ɛɛdenɔ kũ an ɔũdenɔdo piki, an mɔ Deke í pɔ kuńdo akpati sɛ Dauda bĩi pɔ wì o Siona wà sudo. Akũ Isila'ilanɔ kɔ kàkaa kia pidi an piki mɔ soopiade Etanimu dikpɛgɔɔ zĩ. Pɔ Isila'ila gbě zɔkɔnɔ kà piki, akũ sa'onnanɔ Deke akpati pì sè kũ kpakĩkpɛdo kũ Deke pɔ pɔ kuũnɔdo. Sa'onnanɔ kũ Lawi buinɔdo mí pɔ pinɔ sè, akũ kia Sulemanu kũ Isila'ila pɔ kàkaadinɔdo sa'ò kũ sãnɔdo kũ zunɔdo akpati pì ɛɛ. Pɔ pɔ an sa'òdo pinɔ dasi kè zài, wi fĩ wà nàoo. Akũ sa'onnanɔ gè kũ Deke í pɔ kuńdo akpatido a kpu ee kpɛ'ɛɛ pɔ wì o luakukĩiũ. An dì a dikĩi gũ malaika gãsĩdenɔ gbu. Malaika pinɔ gãsĩnɔ potopotona akpati pìla kũ a selinɔdo. A séli pinɔ gbãá, wì an lé e Deke kpé pì kpɛlewa, esɔ wìdi e ɔũuo. Lí pinɔ ku gũ ee gbãa. Peke ba ku akpati piũo, sema gbè alo men pia pɔ Musa dàũ Holebu, gu pɔ Deke ò akũ í dakũ ku kũ Isila'ilanɔdo an bona Masa gbezã.

Pɔ sa'onnanɔ bùte Deke kpu, giligize kpé pì pà, andi fĩ an gè zĩkedi gũo giligize pì yãdi, zaapɔ Deke gakwi kpé pì pà. Akũ Sulemanu ò: Deke ò akũdakũ ku giligize siaũ. Akũ à ò Dekene: Ma kpé lezĩ di dɔnne. Ñkũ kuũ gɔɔkepiki. Akũ à lĩte à ɛɛdò paiwa à sa maa ònné. Akũ à ò: Wà Deke Isila'ilanɔ Lua

saabukpa! À alkawalikè ma mae Daudane, akū à kènɛ. Zaapɔ à ò, zaa gɔɔ pɔ à a gbɛ Isila'ilano b̀ute Masa, akūdi Isila'ila b̄i ke di wà kpɛdɔ̄akūneo. Dauda an à sè a gbɛ Isila'ilano ḡen'ɛede ũ. Pɔ ma mae Dauda yidi à kpé dɔ Deke Isila'ilano Luane, akū Deke òne, kpɛdɔna akūne pɔ a tɔ dakū kuwa laasoo pɔ à kè pì maaɛ, es̄ i ke akū mí àa dɔ akūneo, a ḡina ne ke mí da dɔ akūne. Akū Deke kè lapɔ à alkawalikèneba. Ma ḡɔ ma mae Dauda ḡɛe ũ, ma z̄ite kpataũ Isila'ilanoũ, lapɔ Deke Isila'ilano Lua alkawalikèba, akū ma kpé pì d̄one, pɔ a tɔ dakū kuwa yādi. Gū ma Deke akpati dik̄i kèkèũ. Deke í kuna kū wá dezinɔdo an bona Masa kpe yā ku akpati piũ.

Sulemanu wobikena a gb̄enɔne

Sulemanu ḡɛe à zè Deke sa'ok̄i ɛɛ Isila'ila pɔ k̄ɔ kàkaa ḡũno wewa piki, akū à ɔsè musu piapia à ò: Deke Isila'ilano Lua, gb̄eke ba mukāndo musu kó z̄iteo. N maakeũ n í ku kū n zɔbenna pɔ andi ta'o lapɔ n̄ yidiba kū nesemendodo. N yā pɔ n alkawalikè n zɔbenna ma mae Daudane kè. N ò kū lɛdo yāa, gbāa sà n kè. Tia diba Deke Isila'ilano Lua, n alkawalikè n zɔbenna ma mae Daudane n ò, tó a buino an ḡina kūna d̄ɔ mí andá ta'o lapɔ n̄ yidiba, andakū z̄itena kpataũ Isila'ila busuũ gɔɔkepiki. Isila'ilano Lua, to yā pɔ n ò n zɔbenna ma mae Daudane ke s̄iana ũ sà. Lua, ndakū ku z̄ite la yāma ya? Musu kū a lez̄ikɛdo da f̄ɔ à n seo, bele kpé pɔ ma d̄onne di sà. Deke ma Lua, maakū n zɔbenna wé gwa, ní ma wobikena si kū ma yālanammado. Swadɔ wiki pɔ maakū n zɔbenna máda pemmadi kū wobi pɔ máda kemmado gbāa. To n wé kū dɔ kpé

diwa gwāafī kū fāatēdo, gu pɔ n ò n tɔ dakū kuwa di pì. Wobi pɔ maakū n zɔbenna máda ke kū εdo dɔna gu piwa ma. Tó maakū n zɔbenna kó n gbē Isila'ilanɔ εdò gu diwa mí wa wobikèmma, ndí wá wobikena si zaa n kukīi musu, ní suukewado.

Tó gbē taalikè a gbēdakenε, mí wà ònε à lɛda kū n tɔdo, tó à mò n ɔūu à lɛdà kū n tɔdo n sa'okīi εε, ndí siíndo kuna zaa musu, ní mɔnné. Ndí yākeke n zɔbennanɔnε, ní yāda taalidela, a yākena i wi a miwa, ní yā nna kpa taalisaidewa, wí le wà dō pɔ i yāke keo. Tó n gbē Isila'ilanɔ ibεenɔ zībèmmá mí wà tàndo duuna pɔ an kènne yādi, tó an εedòmma an n tó sì, tó an wobikèmma an menakpànne ee kpé diū, kuna zaa musu ndí siíndo, ní suukeíndo an duuna yā musu, ní suíndo bùsu pɔ n kpà an dezinɔwa piū.

Tó luabe gè da gii, legū dá mao, pɔ an duunakènne yādi, tó an εedò gu diwa an wobikèmma an n tó sì, mí an mikè an duunanɔwa pɔ n ñadàmmá yādi, kuna zaa musu ndí siíndo, ní suukeíndo an duuna yā musu. Ndí an da zé maaū, ní tó legū ma an bùsu pɔ n kpà n gbēnɔwa an pɔ ū piū. Tó nɔa kó gagyā kà bùsu piū, kó pɔwen yōkpana kó pɔ fūfūkpana kó kwa gulungulunɔ kó kwa labenɔ kó tó ibεenɔ koelè an bīi kedi kó tó muse kó gyā gèú, tó an gbēke yā pɔ a le dō mí à ɔnɔ dō kpé di kīi ɔdi, mí à wobikèmma à menakpàmma, kuna zaa musu ndí sido. Ndí suukedo, ní a yākeke. Ndí fīabone a yākenawa, zaapɔ n a nese dō. Mɔkɔn mí n gbēmpiki nese dō. Maka andìkū vīamanne ee an unde leū bùsu pɔ n kpà an dezinɔwa diū.

Tó wà sù wà n tɔ zɔ̀kɔ̀ kũ n ɔ̀gãsi gbãado kũ n ɔ̀ pɔ̀ potonado bao mà, tó bomɔ̀ pɔ̀ de n gbẽ Isila'ila bui ũo bò b̀sũ zãu à m̀ n tɔ yãdi, tó à ɛ̀d̀d̀ kpé diwa à wobikèmma, kuna zaa musu ndí sido, ní yã pɔ̀ à làmma kene, pɔ̀ ãnua bui piki le an n tɔ d̃, andí ṽiãmanne, lapɔ̀ n gbẽ Isila'ilano di kenneba, andíkũ d̃ pɔ̀ n tɔ ku kpé pɔ̀ ma d̀ diwa.

Tó n gbẽno b̀ute an g̃e z̃ikadi kũ ní ibeenodo gu pɔ̀ n an z̃i piki, tó an ɛ̀d̀d̀ b̃i pɔ̀ n kàte diwa kũ kpé pɔ̀ ma d̀nne dido, mí an wobikèmma, kuna zaa musu ndí síndo mena pɔ̀ an kpànnne yã musu, ní yã nna kpammá. Lapɔ̀ gbẽke ba ku pɔ̀ g̃i duunakedio, tó an duunakènnne mí n pɔ̀ pàndi, n an na an ibeenone z̃i mí an tàndo an busu z̃izɔ̀no ũ b̀sũ z̃auna kó a kãinan d̀, tó an s̃l̃ite b̀sũ pɔ̀ andá z̀beũ piũ, mí an menakpànnne gũ an ò, wa duunakè, wa taalikè, wa yã ṽai kè, tó an s̀uka an s̀umma kũ nesemendodo kũ puiãdo piki zaa b̀sũ pɔ̀ andá z̀beũ an ibeenone piũ, tó an ɛ̀d̀d̀ b̀sũ pɔ̀ n kpà an dezinwa kũ b̃i pɔ̀ n kàtedo kũ kpé pɔ̀ ma d̀nne dido, mí an wobikèmma, kuna zaa musu ndí síndo mena pɔ̀ an kpànnne yãdi, ní yã nna kpammá. Ndí suuke kũ n gbẽ pɔ̀ an duunakènnenodo kũ taali pɔ̀ an kèdo, ní tó gbẽ pɔ̀ andá z̀bennéno an an we gwa, zaapɔ̀ gbẽ pinɔ̀a n gbẽ pɔ̀ n an bute Masa m̃ogatekpe t̃ũno, n aizek̃e.

To n wé kũ d̃na maakũ n z̀bennawa, ní swadɔ̀ mena pɔ̀ ma kpànnedi kũ mena pɔ̀ n gbẽ Isila'ilano kpànnedo, ní swad̃ndi g̃ɔ̀ pɔ̀ an lez̀undi piki. Deke Lua, zaapɔ̀ ãnua bui

pikiũ ankũnɔ n an se n gbẽnɔ ũ, lapɔ n dà n zɔbenna Musane à ò gɔɔ pɔ n wá dezinɔ bùte Masaba.

Gɔɔ pɔ Sulemanu dá wobike Dekewa maka, a kutena a kosowa, akũ a ɔnɔ dɔna musu. Pɔ à menakpane maka à làka, akũ à fête à zè Deke sa'okĩa gũ, akũ à sa maa ò Isila'ila pɔ kɔ kakaana gũnɔne à ò gbãagbãa: Wà saabuke Dekene, zaapɔ waakũnɔ a gbẽ Isila'ilanɔ, à wá gba kãmabokii lapɔ à òba. Yã maa pɔ à dà a zɔbenna Musane à ònɔ kè piki, a ke di letè pão. Deke wá Lua kũ kuwado, lapɔ a ku kũ wá dezinɔdoba. À wá to gũo, à pãkpawadio. À to wà wá s̃s̃ kpaakũwa, wíkũ ta'o lapɔ a yidiba, wíkũ a yãdinanɔ kũna kũ yã pɔ à ò wá dezinɔnenɔdo, wíkũ a ɔt̃ɛndɔkii gwa. Mena pɔ ma kpà Deke wá Luane, àkũ d̃ũ fãat̃e kũ gwãafido, ìkũ yã nna kpa maakũ a zɔbennawa kũ a gbẽ Isila'ilanɔdo lapɔ gu dá dɔba, ãnua bui piki dí d̃s̃ pɔ Deke Luae, a ke ba kuo. Sema à á s̃s̃ kpa Deke wá Luawa miɔmiɔ, ìkũ a ɔt̃ɛndɔkii gwa, ìkũ a yãdinanɔ kũna lapɔ wá kũna gbãaba.

Deke kpele legona

Akũ kia kũ Isila'ilanɔ piki sa'ò Dekewa. Sulemanu saabukpasa ò Dekewa kũ zunɔdo oaa sɔosɔo lɛɛ bao kũ piado (22,000) kũ sãnɔdo oaa sɔosɔo lɛɛ oaa soodo (120,000). Maka kia kũ Isila'ilanɔ piki an Deke kpé lé gò. Zíbeezi kia gbãsíbo ɔũ pɔ ku Deke kpé kpelene, akũ à sa pɔ wì a pɔ ka teũ à tekũ ò gũ kũ pɔwen gbado kũ saabukpasa nisido, zaapɔ sa'okii pɔ à kè kũ mɔt̃eã gbãado a ku Deke kpé kpelewa ba z̃k̃ɔ, i f̃s̃ à s̃i pikio. Zíbeezi Sulemanu kũ Isila'ilanɔ piki an dikpekè Deke an Luane

ee gɔɔ soopia, akū an Lakpedɔna dikpekè gɔɔ soopia dɔ. Gɔɔ piki kè gɔɔ gēo mendosai. Wa dasi maamaa, wà bò zaa Hamata Lebo ee à gèè à pè Masa zé swawa. A gɔɔ swaakɔde zǐ à an gbɛɛ, akū an lezàwa, an tà an bewa kū pɔnnado. An pɔ kè nna yā maa pɔ Deke kè a zɔbenna Daudanɛ kū a gbē Isila'ilanɔdo piki yā musu.

Deke bon mɔna Sulemanuwa

Pɔ Sulemanu Deke kpɛ dɔ kū a bɛdo kū zǐ pɔ a pɔ dɔwanɔdo à làka piki, akū Deke sùka à bò à mɔwa Gibeɔ a gēn piade, à ònɛ: Ma wobi pɔ n kè kū mena pɔ n kpameado mà. Ma kpé pɔ n dɔ pì dì ma pɔ ũ, ma tɔ dakū kuwa lakasai. Ma wé dakū dɔwa, ma pɔ dīkū dɔwa gɔɔkepiki. Mɔkɔn sɔ, tó n kumɛa susu kū nese puado landɔ n mae Daudaba, mí n ma yādinneɔ kūna kū ma yā'onnenɔdo, mí n da ma ɔtēndɔkī gwa, maa n zītɛna kpataŭ Isila'ilanɔŭ zīnnapɛte, àakū lakana vīo, lapɔ ma alkawalikè n mae Daudanɛba ma ò, a buinɔ dakū zītɛna kpataŭ Isila'ilanɔŭ gɔɔkepikiɛ. Tó mɔkɔn kó n nenɔ bò ma kpɛ sɔ, tó i ma ikoyānɔ kūo kó yā pɔ ma òanɛnɔ, mí a gɛɛ áda zɔbe deke kenɔnɛ, áda kutenné, maa Isila'ilanɔ butɛ bùsu pɔ ma kpàmmáŭ, mí gi kpé pɔ ma dī ma pɔ ũ pidi, andí gɔ yaadɔbɔ ũ, bui piki i an kɛ yaasezubɔ ũ. Baa kū kpé pì lezīkɛdo, a yā da bo gbē pɔ dá gēte gūnɔ sɛɛ. Anda fiona ga an o: Bɔyādi Deke kè bùsu dinɛ kū kpé dido makai? Wi onné: Pɔ an pākpa Deke an Lua pɔ an dezinɔ bùte Masadi yādi. An zè kū deke kenɔdo, an an sisi, an zɔbènné. A yādi Deke muse bee zǐmmá piki.

Sulemanu yã kɔɔnɔ

Sulemanu kpé men pia pinɔ dɔ wɛ̀ bao, Deke kpé kũ a gĩna kpedo. A kpe à Galili b̀usu bii kpà Taya kia Hilamuwa men bao, zaapɔ Hilamu sida lí kũ kpɛ̀ lido kũ zĩnalido kpàwa lapɔ a yidiba. Pɔ Hilamu b̀o Taya à gèe bii pɔ Sulemanu kpàwanɔ gwà, i keneo, akũ à ò: Ma gbɛ̀, bii kpete takanɔ n kpàma gũì? Akũ wà tokpà b̀usu pìne Kabulu ee gbãa. Hilamu zĩnali kpàzã Sulemanunɛ yãa tɔn siikɔ.

Gbɛ̀ pɔ Sulemanu an dá zɔzĩunɔ baon di. Gbɛ̀ pinɔ Deke kpé kũ Sulemanu kpedo zĩ kè. An Milo è tàta kũ busudo an Ulusalima gĩ dɔ kũ gbèdo, an Hazoo kũ Magidodo kũ Gezɛedo kèkè. Masa kia Fili'auna mí lète Gezɛewa yãa, akũ à s̀i à tesòwa, à Kanaa pɔ kuĩnɔ dède, akũ à kpà a nenɔgbɛ̀wa zãkegbaa ù, gɔɔ pɔ à a kpàzã Sulemanuwa. Akũ Sulemanu Gezɛe pì kèkè kũ Beteholoni Zĩtedo kũ Baalatado kũ Tadamɔ pɔ ku a b̀usu gugbangbɛ̀udo, kũ bii pɔ a kũsĩa kàteũnɔdo kũ bii pɔ a s̀gonɔ kuĩnɔdo kũ bii pɔ a s̀nɔ kuĩnɔdo kũ kpé pɔ a yidi à dɔ Ulusalimanɔdo kũ Lebanɔdo kũ b̀usu pɔ ada kpatabewanɔdo piki. Bui pɔ ba Isila'ila ùonɔn di: Amɔlinɔ, Hitinɔ, Pelizinɔ, Hivinɔ kũ Yebusi kɔɔnɔdo piki, gbɛ̀ pɔ Isila'ilanɔ di fɔ an an dedeɔnɔ, an bui pɔ g̀ an b̀usu piũnɔ. Sulemanu bui pinɔ dà zɔzĩu, akũ andikũ zĩ pì ke maka ee gbãa. I Isila'ilanɔ da zɔzĩ piũo. Ankũnɔ à an dí a zĩkannanɔ ù kũ a ibaanɔdo kũ a kia dakenɔdo kũ a gbɛ̀nɔ gɛ̀n'ɛɛdenɔdo kũ a zĩka s̀godenɔdo kũ a s̀denɔdo. Ankũnɔ mí zĩ pɔ wada ke pì gbɛ̀ zɔkɔnɔ ù dɔ, an gbɛ̀n oaa pia kũ basoopiakwido (550).

Pɔ Fili'auna nenɔgbɛ̀ bɔ̀ Dauda biiũ̀ à tà a kpé pɔ Sulemanu dɔ̀nɛũ̀, akũ Sulemanu Milo è tàta. Wè kũ wèdo Sulemanu dikũ sa'o Dekewa gɛ̀n aakɔ́'aakɔ́. Ì sa pɔ wì a pɔ ka teũ̀ à tekũ kũ saabukpa sa'obɔdo o sa'okĩ̀ pɔ a bɔ̀ Dekenewa, ì tulaleti ka teũ̀ Deke ɛ̀ gũ dɔ̀. Maka à Deke kpé zĩnɔ̀ kè lapɔ̀ a maaba.

Kia Sulemanu go'itepɔnɔ̀ kè Eziɔ̀gebeɛ̀, Elata sɛɛ̀ ɛ̀dɔmu busuũ̀ Teku Tɛ̀a lɛ̀wa. Hilamu à a go'itepɔde pɔ tekɔ dɔ̀nɔ̀ zĩ̀ gũ, akũ an dà tekɔ musu kɔ̀a kũ Sulemanu gbɛ̀nɔdo. An gɛ̀ɛ̀ Ofii an zĩnali nàkãa gũ tɔn gɛ̀o, an sùdo kia Sulemanunɛ̀.

Seba bùsu nɔgbɛ̀ kia mɔ̀na Sulemanu gwadi

Pɔ Seba bùsu nɔgbɛ̀ kia Sulemanu bao mà Deke tɔbona yã musu, akũ à mɔ̀ a yɔ̀di à gwa kũ yã zĩ̀ĩ lanawado. Pɔ à kà Ulusalima kũ a ibaanɔdo dasidasi kũ pɔ gbĩ nnanɔdo kũ zĩnalido maamaa kũ gbè beɛde pɔ yangonɔ̀ sɛnanɔdo, akũ à gɛ̀ɛ̀ Sulemanu kĩa, à yã pɔ ku a neseũ̀ faai bɔdo piki. Akũ Sulemanu yã pɔ à làwanɔ̀ bɔketekène piki. A ke bɔkete di fɛ̀doo. Pɔ nɔgbɛ̀ pì Sulemanu ñnɔyã mà piki, mí à kpé pɔ à dɔ̀ è kũ pɔbena pɔ ì bedo kũ a ibaanɔ̀ kunado kũ a be zĩkennanɔ̀ zĩkenado kũ an pɔkasanɔdo kũ a inabi'idãnnanɔdo kũ sa pɔ à ò Deke kpé ɔ̀ũunɔdo, yã pì bɔ̀ a sɛɛ̀, akũ a lé gɔ̀ gona. Akũ à ò kiane: N yãkenanɔ̀ kũ n ñnɔ̀ bao pɔ ma mà zaa ma busuũ̀do sĩanaɛ̀. Mi yã pinɔ̀ sio ee ma gɛɛ̀ ma kado la, akũ ma wɛ̀ è sà. Wi omɛa pikio fa! N ñnɔ̀ kũ n aizekenɔ̀ de lapɔ̀ ma a bao màla. Minnadenɔ̀n n gbɛ̀nɔ̀ ù kũ n ibaa pɔ andikũ kundonɔ̀ gɔ̀ɔ̀kepiki, andì swadɔ̀ n ñnɔ̀yãdinɔdo! Wà Deke n Lua

saabukpa, zaapɔ n yã kàu, akū à n kpa Isila'ılanɔ kpataũ. Deke yina Isila'ılanɔdi gɔɔkepiki yã mí tò à n kpa kia ũ, pɔ ñkū yãkekenné a zewa yãdi. Akū nɔgbē pì kia gbà zĩnali tɔn siikō kū pɔ gbĩ nnanɔdo dasidasi maamaa kū gbè bɛɛdenɔdo. Pɔ gbĩ nna pɔ à kia Sulemanu gbà pinɔ dasi, gbēke di mɔdone à kà maka dɔo.

Hilamu go'itɛpɔ pɔ sù kū Ofiido kū zĩnalidonɔ sù kū lí bɛɛdenɔdo maamaa kū gbè bɛɛdenɔdo dɔ. Akū kia Deke kpé kū a gĩna kpɛdo pɔnɔ kèdo, à mɔɔnanɔ kū domanɔdo kèdo lesinnanɔne dɔ. Wi mɔ kū lí pì buido pɔ ka maka dɔo, wi e maka dɔo ee gbãa.

Pɔ pɔ Seba b̀usu nɔgbē kia yidi piki, à kia Sulemanu là, akū à a gbà, gba pɔ à d̀ane sɔk̀s̀k̀k̀nɔ baasi. Akū à s̀uka à tà a busuũ kū a ibaanɔdo.

Sulemanu aizekɛnɔ

Zĩnali pɔ Sulemanu dì le wē kū wēdo dì ka tɔn bao kū aakōdo, wē'ɔgo pɔ tageennanɔ kū lagatannanɔdo kū Lalabunɔ kianɔdo kū b̀usu gbē zōkōnɔdo andi bone baasi. À dākpaɔ zōkōnɔ kè kū zĩnali pɔ wà gbēgbēdo men oaa do, an baapiki gbia kà kilo aakō'aakō kū kōdo. À dākpaɔ f̀ɔnanɔ kèdo dɔ, an baapiki gbia yidi à ka kilo piapia. À dākpaɔ pinɔ kàte kpé pɔ wì o Lebanɔ Likpēũ. Kia kiakɛguu zōkō kè kū wisa sakado, akū à zĩnali tētēe kùtewa. Guu pì dɛdekĩ vĩ, a gbadidikĩ soodo. A kpenakĩ musu dɛ m̀nɔnɔ goda sai. A gāsĩdikĩnɔ vĩ, nɔɔmusu pɔ wà kènɔ zeze gāsĩdikĩ pinɔ sɛɛ. Nɔɔmusu kena

pinɔ zεzε gbapεpekĩ pinɔwa piapia ɔpiadi kũ ɔzengedo, an piki kè kwi weepia. Wi guu pì taka ke bùsu keũ yãao. Kia Sulemanu imibɔnɔ zĩnalie piki. Kpé pɔ wì o Lebanɔ Likpe pɔnɔ piki zĩnali t̄ēt̄ē. Suluva peke ba ku gũo, zaapɔ wìdi suluba di peke ù Sulemanu gɔɔwao.

Kia teku go'itepɔnɔ òikũ dana teku musu kũ Hilamu gonɔdo. Wè aakɔ kũ wè aakɔdo andikũ su kũ zĩnalido kũ sulubado kũ wisa sakado kũ gbakũnɔdo kũ bã bui maanɔdo. Kia Sulemanu aizεke kũ a ònɔdo zɔkɔ de ānuva kianɔ pɔla piki. Gbēmpiki dá ze wete à wesi Sulemanule, andi swadɔ a ònɔyã pɔ Lua dànε a s̄udi. Wè kũ wèdo wìkũ mɔne, baapiki kũ a gbado: Suluva pɔnɔ, zĩnali pɔnɔ, utanɔ, zĩkabɔnɔ, pɔ gbĩ nnanɔ, s̄nɔ kũ faaganɔdo. Sulemanu zĩkas̄gonɔ kũ s̄nɔdo kàkaa, a s̄go pinɔ oaa soopia (1,400), a s̄nɔ s̄ oaa sɔosɔo lee kwi weepia (12,000). Wì a s̄ pinɔ gwa a s̄go bĩnɔũ kũ a be Ulusalimado. Kia tò suluba dasi Ulusalima landɔ gbèba, mí sida lí pɔ wà kpɛdòdo dasi landɔ betε liba lakpeũ. Sulemanu s̄ pinɔ bò Masa kũ Silisia busudo. Kia lagatannanɔ mí andi ge luludi gũ. Andi s̄gonɔ lulu Masa suluba kilo sopiapia, s̄nɔ s̄ kilo piapia taka, akũ ì suka à s̄ pinɔ yia Hiti kianɔ kũ Sulia kianɔwa dɔ.

Sulemanu nanɔ

Kia Sulemanu yi bui ke nɔgbēnɔdi dasi. Fili'auna nenɔgbē baasi, akũ à Mɔabunɔ kũ Amɔninɔdo kũ Eɔɔmunɔdo kũ Sid̄denɔdo kũ Hitinɔdo nàkãa nanɔ ù. Deke ò Isila'ilanɔne an su an bui pinɔ s̄εo, zaapɔ anda an s̄ate, andikũ sa'o an

tāanɔwa. Esõ Sulemanu nammá pɔ a yíndi yādi. À kiabuino sè na ũ gbēn oaa aakɔ kũ basɔodo, mí à na pɔ i mese dinneonɔdo vī dɔ oaa do kũ basɔodo. Akũ a na pinɔ an a sàte. Pɔ à zikũ, a nanɔ tò à tè tāanɔdi, i a s̄ kpa Deke a Luawa miɔmiɔ lapɔ a mae Daudabao. À tè Sidɔdenɔ tãa Asetoletidi kũ Amɔninɔ tãa Mɔleku pɔ Lua ba yi a gbĩ yādiodo. À yã pɔ Deke ba yidio kè, i tedi kũ nesemendodo landɔ a mae Daudabao. Akũ à gèe à sa'okĩi bò sīsĩ pɔ ku Ulusalima zĩte ɔdi musu. À sa'okĩino bò Mɔabunɔ tãa vāi Kemɔsi pɔ Lua ba yi a gbĩ yādione kũ Amɔninɔ tãa vāi Mɔlekudo. Maka à kè a bui ke nanɔne piki, akũ an tulaleti kà teũ an tāanɔne an sa'ømmá.

Akũ Deke Isila'ilano Lua pɔ pà Sulemanudi, pɔ à bò a kpe, a s̄ ba kuwa dɔo yādi, zaapɔ Deke bò à m̀wa yãa gēn pia. Baa pɔ Deke òne a su à te deke kenɔdio, i yã pɔ Deke dìne pì mao. Akũ Deke òne: Lapɔ maka n sè, ndi ze kũ ma í kunando yādo kũ yã pɔ ma ònnenɔdo, maa n bo kpataũ, mí n zɔben ke di n gēe ũ. Esõ n mae Dauda yādi maa ke n gɔɔwao, n né an maa kene. Esõ maa a bo kpataũ pikio. Bui lee do an maa to n né pine ma zɔbenna Dauda yādi kũ Ulusalima pɔ ma sè ma pɔ ũdo.